



QVÆSTIO MEDICA

Quodlibetariis disputationibus manè discutienda in Scholis
Medicorum die Iovis 3. Decembris.

M. IOANNE-BAPTISTA RENATO MOREAV,
Doctore Medico, Præside.

An ex vocis & loquela modo, Corporis & animi virtus coniici possit.

I.

HOMO ex duobus constat, corpore & anima: absque horum alterutro non homo sed ἀνθρώπου ἢ pronascitur. Corpus solum caducum & dissipabile, licet eleganti formâ præditum, est ingens sine nomine truncus, hæc semper una, & originis planè divinæ, corporis ergastulis semel expedita, sui semper est juris, & suum munus perfectius exequitur: sed nullus est homo. Anima tamen longe nobilior, insitas & quasi consignatas in se recondit notiones, omnium virtutum, & scientiarum semina: ut nemo sit adeo rudis, qui non aliquando instituatur. Synceras, nec corporis labe infectas ἐννοίας, cum vi propria elicit, aut potius inspicit, modum ponit suis cupiditatibus, quibus variè solet distrahi, eumque una metritur prudentiâ, quæ sola omnis est virtus, atque cum eadem anima innata cupiditate videndi veri, maxime ducatur; rerum omnium principia quæ concludit tractans & retractans, unius initij vinculo, res omnes quasi concatenatas contineri demonstrare nititur: sicque quod non videt verum, sibi fingit: immensam cœli magnitudinem definit, solis cursum signat, notat stellarum progressionem & institutiones, quid apud se fiat distinctè animadvertit, non ita sciens rerum quæ in corpore peraguntur, ex quo utriusque naturam infinitis spatiis diffitam probe intelligere est.

II.

CORPORIS humani dignitas, non opinione existimanda; illa est quanta placuit naturæ inventori, & principi: non qualis placet quibusdam Philosophis. In eâ re quæ habet quod ad natu-

ram voluit pertinere Deus, nihil desideratur. Hinc homo qui duos oculos, ambas manus, binos pedes obtinet, cumulatè perfectus censetur, non qui uno, aut centum luminibus, manibus centum, vel quatuor pedibus instruitur & utitur, quæ sunt fabularum non naturæ inventa. Homo animalium formosissimum & infirmissimum, mundi incola & spectator, rerum externarum imaginem per sensus qui viæ quædam sunt ad animam perforatæ, curiosissimè haurit, sibi primò consulens in consuetandâ voluptate, & declinando dolore; deinde ad cæteras res occurrunt, otandi causa se applicans, immensam tamen rerum objectarum varietatem, & numerum, non accipi eo conjici potest, quod cuilibet sui sint sentiendi termini, quos citra, aut ultra aut non movetur aut læditur. Nonne illi qui acutius cernit, restat aliquid quod oculos effugiat, non sunt profecto certa extrema, nec omnibus eadem. Quorum corpus natura optime coadmentarit, ij multo potentius admovent suos sensus, tardiusque & desistunt, & mortem oppetunt: quorum organa minus belè sunt constituta, ij minus sagaces habentur, celeriusque ab opere vacant & occumbunt. Ut enim lapides duriores & compactiores, difficilius atteruntur & divelluntur, ita & quod optimè conglutinarum est corpus, ægrè dissolvitur.

III.

SED quidquid feliciori meditatione conquirit homo, quidquid à sensu traditum & impressum effingit, sibi soli haberet, nisi certo quodam modo aliis largiretur: signis nempe ostendit suam mentem, vocem & litteris hanc excogitavit natura, illæ necessitati debentur. Homo miser inops, & ægre apud se manens, sonos & litteras æque animi interpretes, ut sibi subveniret, adinvenit. Larynx legitimum vocis organum & multitudine muscutorum & corporibus duris, concavis, politisque & rimulâ præcipuè apparatus, licet omnium animantium ferè communis, uni tamen homini vox maxime ingenita est, quam variè flectit & immutat, quia rationis compos, & μιμητικώτατος, cum cætera animantia ad pastum abjecta, aut omnino fileant, aut si quem profundant sonum, non tam amplis distinguatur differentiis. Quia ἀλογιστα & inepta. Cartilagine tres, thyroideam quæ prominet scuti in modum, Cricoidem quæ annulum imitatur, & arytænoidem quæ duplex, & infundibuli formam refert, callidissimo artificio fabricata est natura. Hæc quælibet, exceptâ Cricoide, à variis musculis incitatur, nondum tamen vox efformata sequitur. Hoc opus adimplet γλωττις quæ rimula est ex duobus arytænoidis processibus efficta, non absimilis linguæ quam fistulæ cicutis compactæ representant. Aere ex amplis pulmonum

spatiis resiliente, per rimulam incredibilem quandam constrictionis & dilatationis varietatem perpessam, varij generis voces cuduntur: quæ connexæ & uno sensu comprehensæ loquelam efficiunt. Ad vocem delicatiorem & nitidiorem conferunt, lingua, plectri similis, & dentes chordarum: Majorem usum palato præbente quod editum sonum retinet. Attamen avulsâ linguâ, attritis dentibus & perforato palato, etiam vox elicitur.

IV.

QUI optimè mirari novit, vocem & loquelam maximè mirabitur, ab homine nihil præstabilius dari potest. Qui primus hominem loquentem audit, credo rei insolentiâ multum fuit attonitus. Frigor à corpore tenui & molli, aut saltem non usquequaque duro promitur, qui etiam homines fortissimos terret. Vox scilicet & loquela mentem pingens aliorum mentes movet & excitat: eadem cum certum quemdam habet motum ordinem & ornatum, dignius assumens nomen, proprium amittit, eloquentia nuncupatur, quæ quo vult ducit animos quasi vinctos, unde vult revocat. Quadam etiam ratione vox composita, & intervallis paribus & imparibus conjuncta harmonia est, spirituum animalium motrix jucundissima, quæ omnibus sæculis fuit aliqua, adeo ut infans puer, & pene balbutiens voces concinnet ad delectationem. Nulla gens est tam barbara quæ suam non habeat eloquentiam & harmoniam. Ita vocis & loquelæ efficacia in animos nota est & perspecta. Hæc est illa quæ imperat, quæ dissipatos homines in societatem convocavit, urbes condidit, amicitiam colit, quæ hominum facit commercium, quæ scientias & artes traducit, quæ malæ animi ægritudini medicinam adhibet, quæ tandem honorificentissimè de authore suo prædicat, vox & loquela ita sunt homini propriæ ut has ad eum magis intimè quam risum, pertinere existimaverim: atque si aliquorum fuisset farum, ab infantiâ recondi in speluncis, nullus dubito, quin solo naturæ invitamento vociferaretur.

V.

CONJECTURA ergo cum innitatur principiis, licet non usquequaque firmis, sed ut plurimum rem eandem commoderantibus, ex vocis & loquelæ modo multa de corporis & animi indole præagere possumus. Laringis equidem est vox, ejusque affectionem proximè declarat, ut effectus causam arguit. At Laryngem disponi ut totum corpus abundè testatur maxima illa commutatio, quæ pubertatem designat, in qua & corpus vegetius & vox gravior evadit: unde in judicandâ corporis facultate voci non temere credi-

tur. Loquela autem cum sit animi cogitantis, qualis illa, talis & ille non immerito statuendus. Sermo facilis copiosus & plenus, animi capax; temerarius & confidens, audaciæ & tenuis: pressus rebus abundantia, non verbis superfluentis index est: qui verecundè & decorè loquitur, modestum & sapientem patefacit animum: qui placidè & sedatè dicit, pacatum & mitem; qui turbulentè, iratum; qui tardè, segnem: qui humanissimè, amantem se docet. Non minora à voce expectanda indicia. Quæ præceps est, & flexibilis, ab organorum libertate & facilitate & à spiritus motu celeri proficiscitur: tarda, spissâ & dura ab aliquo in instrumentis impedimento: acutam aut gravem faciunt unâ cum glottidis tenuitate. Laryngis siccitas aut amplitudo humore diffuens. Magna, contenta & elata, qualis pedem dicentium, loci aerem concludentis capacitatem & robur consequitur; Secus parva inclinata & summissa. Tremens & firma, spirituum vim significat aut imbecillitatem. Hactenus quod conjecturis superstruximus, totum est opinabile, præcipuè quod de animo per loquelam sumus rimati. De illo namque vix quidquam certi haberi potest, nisi quod sponte patefecerit; cum in omnes corporis motus potestatem habeat, quos ad libitum administrat: ex quo fit ut sæpe numero signa persistant, res vero significata nulla sit, quod Socratis celeberrimo exemplo patet, quem Zopyrus physionomon notaverat, licet vitia non extarent in vultu & oculis indicata, nihilominus stat conclusio.

Ergo ex vocis & loquela modo, corporis & animi virtus coniici potest.

Domini Doctores disputaturi.

M. Petrus Bonnet.

M. Ioannes de Mauvillain.

*M. Ioannes-Baptista-Renatus Moreau
Praefes.*

M. Nicolaus Pelletier.

M. Renatus le Comte.

M. Franciscus Afforty.

M. Petrus Cressé.

M. Ioannes-Antonius Morandus

Centor.

*M. Alex. Michael Denys,
Professor Regius.*

Proponebat Lutetiæ PETRUS LAURENCEAU Pontor-
sequanus Campanus. A. R. S. H. MDCLXXVI.

P A R I S I I S,

Apud Franciscum Muguer, Regis & Illustrissimi Archiepiscopi
Parisiensis Typographum.